

BATISIM DAL SIGNÔR

Antifone di jentrade cf. Mt 3,16-17

A pene che Jesù al fo batiât si vierzerin i cîi
e il Spirt al restà parsore di lui come colombe
e la vôs dal Pari e disè:
Chel chi al è gno Fi il preferît,
là che o ài metude dute la mê contentece.

Si dîs Glorie a Diu.

Colete

Diu onipotent e eterni,
che daspò dal Batisim di Crist tal flum Jordan
tu lu âs proclamât a plene vôs come to Fi plui cjâr,
biel che il Spirtu Sant al vignive jù sore di lui,
daur ai fîs che tu âs adotât,
tornâts a nassi da l'aghe e dal Spirtu Sant,
di condurâ par simpri tal to bonvolê.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

O ben:

Diu, che il to Unigjenit al è comparît tun cuarp come il nestri,
danus la gracie,
daspò di vêlu cognossût par di fûr compagn di nô,
di diventâ par dentri compagns di lui.
Lui che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 42,1-4.6-7

Ve il gno servidôr, che la mê anime si console in lui.

Dal libri dal profete Isaie
Cussì al dîs il Signôr:
«Ve il gno servidôr, che jo lu ten sù,
il gno elet, che la mê anime si console in lui.
O ài metût il gno spirt parsore di lui;
lui ur puartarà il dirit ai foescj.
Nol berlarà, nol alçarà l'intono,
nol fasarà sintî pes placis la sô vôs.
Nol crevarà la cjane rote,
e nol distudarà il lusurut che al sta par murî;
al proclamarà il dirit cun fedeltât.
Nol larà denantdaûr e nol colarà abàs
fin che nol varà plantât il dirit su la tiere,
e lis isulis a bramaran il so insegnament.
«Jo, il Signôr, ti ài clamât te justizie
e ti ài cjapât pe man,

ti ài dât dongje e ti ài metût
aleance di popul e lûs dai forescj,
par che tu ur vierzis i vôi ai vuarps
e che tu fasis saltâ fûr de preson i presonîrs,
e de lôr presonie chei che a vivin tal scûr».
Peraule di Diu.

SALM RESPONSORIÂL dal Salm 28

R. Glorie e laut al to non, Signôr.
Dait al Signôr, fîs di Diu,
dait al Signôr glorie e potence,
dait la glorie dal so non al Signôr,
denant dal Signôr in zenoglon butaitsi,
cuant che al comparis vistût di santitât. **R.**

Vôs dal Signôr parsore des aghis,
il Signôr parsore de imensitât des aghis.
Vôs dal Signôr plene di fuarce,
vôs dal Signôr di maiestât incolme! **R.**

Al à tonât il Diu de glorie,
e “Glorie!” tal so templi ognun al berle.
Il Signôr si è sentât parsore des grandis aghis,
si è sentât il Signôr come re par simpri. **R.**

SECONDE LETURE At 10,34-38

Diu al à onzût di Spirtu Sant Jesù di Nazaret.

Dai Ats dai Apuestui

Alore Pieri al cjapà la perauale e al disè: «Mi stoi propit sancirant che il Signôr nol fâs preferencis cun nissun e che in ogni part di mont al à agrât chel che lu tem e al pratiche la justizie. Lui ur à mandade la sô perauale ai fîs di Israel, puartantjur la buine gnove de pâs midiant di Jesù Crist. Al è lui il Signôr di ducj. O savês ce che al è sucedût par dute la Judee, scomençant de Galilee, daspò dal batisim predicjât di Zuan, cemût che Diu al à onzût di Spirtu Sant e di virtût Jesù di Nazaret, che al è passât fasint dal ben e vuarint ducj chei che a jerin paronâts dal diaul, par vie che Diu al jere cun lui».

Peraule di Diu.

CJANT AL VANZELI cf. Mc 9,7

R. Aleluia, aleluia.

Si son spalancâts i cîi e la vôs dal Pari e à dit:
«Chel chi al è gno Fi il plui cjâr: scoltaitlu!».

R. Aleluia.

VANZELI Mt 3,13-17

A pene batiât, Jesù al viodè il Spirt di Diu a vignî sore di lui.

Dal vanzeli seont Matieu

Alore Jesù de Galilee al capità tal Jordan par fâsi batiâ di Zuan. Ma Zuan al voleve impedîjal disint:
«O soi jo che o ài dibisugne di jessi batiât di te e tu invezit tu vegnis di me?». Ma Jesù i disè:
«Lasse par cumò, parcè che al è ben che o fasìn dut ce che al è just». Allore al acetà. A pene jentrât ta l'aghe, Jesù al tornà a saltâ fûr. E ve che si vierzerin i cîi parsore di lui e al viodè il Spirt di Diu a

dismontâ jù come une colombe e a vignî sore di lui. E ve: e rivà dal cîl une vôs che e diseve: «Chel chi al è gno Fi il preferît, là che jo o ài metude dute la mê contentece».
Peraule dal Signôr.

Si dîs O crôt.

Su lis ufiertis

Acete, Signôr, i regâi che ti presentî te rivelazion dal to Fi tant cjâr,
e fâs che l'ufierte dai tiei fedêi
si trasformi tal sacrifici di chel che al à volût parâ jù il pecjât dal mont
parcè che al veve dûl di nô.
Lui che al vîf e al regne tai secui dai secui.

Antifone a la comunion Zn 1,32.34

La testimoneance di Zuan e je cheste:
Jo lu ài viodût e o ài testimoneât che lui al è il Fi di Diu.

Daspò de comunion

Sostentâts cul sant regâl, Signôr,
o preî cun dute umiltât il to boncûr
di scoltâ cun fedeltât la vôs dal to Unigjenit
e di jessi clamâts e di jessi pardabon tiei fîs.
Par Crist nestri Signôr.